

याकोब

याकोब लिहि कीता चिटि

इद चिटितुन बारेता गोस्टि

लिहि कीतोना पोरोलः याकोब

लिहि कीता सालः किरिस्तु सकम लग-बग चालिस सियुनल्ते पनस (४५-५०) सालकुन नड्डुम लिहि किय्वल जग्ता.

मुके गोस्टि: अद गट्कते याकोब इंवल पोरोल वेलेटिरकुन मत्ता. वीर्गटल वेर याकोब येसुनोर तमुर आंदुर. येसु पिसि मनेके, वेर याकोब वोन्गा बरोसा इर्मकि बति, सासि-नेंड्ता पेजे, वोर येसु करलेन बगवंतनोर मरि आंदुर इन्जेर सूडसि, करि कीसि बरोसा इर्तोर.

मरट तक्लिब्बनड परिक्सन वोर्चि मुने ताक्केके, बगवंतन पोरो करल बरोसा मंता इंवल दुस्मुरकुन करे मांता. चर्चितुर सडा अनि बहिङ्गुर लोकुर सडा मंवल तरिका सूडसि, करल बरोसतुन बारेते करि किया वचो. किय्वलिक काम्क अनि वड्कवलिक गोस्टिन हिंदल, करल बरोसा मंता कि सेले इन्जेर माकुन करे मांता. करल बरोसतुन बहन करि कियना इंवडुन बारेते इद चिटितगा मंता.

१ बगवंतल अनि येसु किरिस्तु पर्बुनोर सेव्कल याकोब्ना आंदुन. दुनिया पूरो पग्रे मासि मंवलिर बगवंतनुर बक्तलिर्कुन* दंडोस दोसि, इद चिटि लिहि कीसेर मंतोन.

बरोसा अनि बुदि-गियन

२-३ नावुर दादलिर-बायिक्निट! मीकुन तक्लिब्बक अनि दुक्सड वातेके गिर मिरट वेले आनंद्ने मंट. बरोसते अब तक्लिब्बक अनि दुक्सन मेय्सि मुने सोत्तेके, मीकुन उंडे इचुर वोर्च्वल गुन अब्बंता इन्जेर मीकुन टावये. ४ मिरट वोर्च्वल गुंतगा बडे मासि गट आतेकेन, चोकोटे बरोसतगा गट आसेर बे-कसुर वालिर आया परंतिट.

५ मिह्यग्टल बोने बुदि-गियन सेल्वेके वोर बगवंतन कोरना. अहन कोर्तोर वोन, राडि
* १:१ बगवंतनुर बक्तलिर्कुनः इत्तेके, बारा कांदनुर यूदुल्कना जातितुर लोकुर इन्जेर ग्रीकु बासते मंता.

सिय्वक्ने कोर्ततुन तेर अदिक सिय्वल बगवंतल आंदुर. ६ बति बगवंतन कोर्नेके, सींतोरो सियोरो इन्जेर अनुमानम्ना बरोसते तल्कमट. अनुमानम्ने तल्कवल सम्दुर्तड हेल्वड बहन वडिदे तेदंतडो अहन मंदंतोर. ७-८ आतोर रंड तीर्क्ने सोन्च किय्वल मायनल तंवा सर्दगा बस्केन बरोबर ताका परोर. अदेन साटि पर्बुनग्टल तनकुन उंडे बतय पुट्मड मंदर इन्जेर आतोर आसा किय्वा.

गरिब अनि दनेवंतल

९ गरिब बक्तलिर तमकुन बगवंतल सीता डगुर-पांदुन पिय्सि, आनंद्ने मंदा लागर. १० बति दनेवंतलिर बक्तलिर तमकुन बगवंतल सीता चुडुर-पांदुन पिय्सि, आनंद्ने मंदा लागर. बारितेके वूर गिर जाडिता पुड्डुन दात साया लागर. ११ पोड्दद पेसियंता, अद येदिते जाडि

वतंता इंवल माकुन टावये. जाडि पुड्डा सोबता रूप करब आंता. अहने दनेवंतलिर बक्तलिर गिर तम्वङ काम्क कीसेर, मनेकेन नासेडम आंतेर.

करब गुन्क बगवंतनल वायोड

१२ दुक्सङ वानेके अवेन वोर्चि मेय्स, मुने सोंवलिर बक्तलिर आसिर्वाद येतंतेर. तनकुन पेर्मा किथ्वलिरकुन बगवंतल वाग्दन सीतोर अद जीवता किरिट* दुक्सङ वानेके, बरोसतगा गट निल्तुरकुन पुटंता. १३ बोनय आयि कसुर कियन साटि मन वित्तेके, बगवंतले नावा मंदुन वितुसेर मंतोर इन्जेर इंवा. बारितेके बगवंतल तंवा मंदुन कसुर कियन साटि वितुसोर अनि मीवा मंदुन आतल बुदि पुटुसोर. १४ बति हर मायनल तंवा कसुर कियना इंवल बुदिते, नियतुन बहके मासि करब्ना आसतगा कोंडे मांतोर. १५ आतल करब्ना आसा पिंडमुन दात बडे मासि, पाप इंवडुन जल्मा सींता. अद पाप बेर्सनचोर बेर्सि, आत्मता सावदुन जल्मा सींता.

१६ नावुर लाड्नुर दादलिर-बायिक्निट! मिरट पसे माय्मट. १७ हर उंदि चोकोट्ना अनि पूरो बर्पुर वाले वस्तु, स्वर्गनगा मंवल बगवंतनल वासेर मंता. वोरे बाबो हाबडगा वेड्चि सिय्वलिकुन निव्हि कीतोर. अव वस्तुना वेड्चिते दड्मि मारियंता, बति बगवंतल बस्केट्के मारियोर. १८ बगवंतल तंवा सते गोस्टितुन हिंदल तना निव्हि कीता कलितगा मरट पंटता मोदोडा ईसतुन दात* मंदना इन्जेर मिय्तोर.

सते गोस्टितुन केन्चि अद गोस्टि तीर काम किथ्वल

१९ नावुर लाड्नुर दादलिर-बायिक्निट! इद गोस्टितुन करि कीम्ट. हर मायनल केन्ज्जले तयर मंदना अनि बड्कनेके सोन्च कीसि जोक्सि बड्कना. वेणे सोडुन वाय्वा. २० बारितेके मायनना सोड बगवंतल इचा किथ्वल, नियत्ना सरि ताकुसा परो. २१ अदेन साटिने मिह्गा मंवल करब-पांदुन अनि बगड-नियतुन सुटि कीसि ताकट. मीवा मन-दिलतुन रोपो बगवंतल इर्ता अद गोस्टितुन पिय्स ताकट. इद गोस्टि मीकुन बचि किया परंता.

२२ बगवंतना वचन सिरिप केन्ज्वले आयो बति, अद वचन वेह्ता तीर ताकना. अहन ताक्वेके मीवा मिरट मोसेम कीतुर आंतिट. २३-२४ बगवंतना गोस्टि केन्चि, अद गोस्टि तीर कियोर वोर मायनल आसतगा तंवा मोकोम सूडसि, तना बहन मंतोरो इंवल बहिर सोन्जि, येंटने मरुड्वन दात मंदंतोर. २५ बति बगवंतना वचंतुन दिहंते सूडतेके तान्गा बतय कमि सेले. पर्जतुन अद मोकडो सुटि कियुसा परंता. अदेन साटि बोर्ते मायनल अद वचंतुन केन्चि, अद वेह्ता तीर कीतोरो, अद वचंतुन वोर बस्केन मन्गोर. बति अद वेह्ता तीर पिसंतोर. आतोर मायनल बद काम कीतेके गिर बगवंतल वोन आसिर्वाद सींतोर. २६ बोर्ते तंवा तनय बक्तना इन्जेर वेह्चेर, तंवा वेन्जेडुन जरब्ने इरा परोरो, वोर तंवा तनकुन मोसेम किथ्वल आंतोर. वोना

* १:१२ जीवता किरिट इतेके स्वर्गनगा बस्केट मंवल जीवा सेलेके मोक्सेम. * १:१८ यूदुल्क पंडुस्ता पंटता मोदोडा ईसा बगवंतनय आंद.

बक्ति बततुने कामि सियो. २७ रांडे वेय्लोकुन अनि पोसटि मरि-मियडुन तक्किलब मनेके, वूरकुन मदत किय्वल बक्तितुने बगवंतल कोसेर मंतोर. अह्वे इद दुनियता पाप तनकुन तुङ्ड्वक्ने सुदुड मंवल बक्तितुन गिर बगवंतल कोसेर मंतोर. इहिन कल्ति सेल्वक्ने मंवल बक्तिये करल बक्ति आंद.

चुडुर-पांदे सूड्वा

२ नावुर दादलिर-बायिक्निट! मथ्यमते जगा जगा मिड्चेर मंवल, येसु किरिस्तु पर्बुन पोरो बरोसा इर्वलिर मिरट, बोने बेद-बाव्ते सूड्मट. २ नमुनतुन वोरोर मायनल सोनेतड मुदड अनि बारितड कप्पिड केर्सि अनि उंडे वोरोर माकडे मातड कप्पिड केर्सि, मिरट मीरे माय्वल रोतगा वातेर इंटु. ३-४ अस्के मिरट बारितड कप्पिड केर्सि सजे मासि वातोन सडा, “दादा! निमे इद चोकोट्ना कुर्सितगा उदा” इन्जेर वेह्विच, गरिबुन सडा, “निमे अगा निला सेलेके इगे बूड उदा” इन्जेर वेह्वेके, मिरट बेद-बाव तोह्विच, करब बुदिते तस्वा कीतुर आंतिट.

५ नावुर लाइनुर दादलिर-बायिक्निट! इद गोस्टि केन्जट. इदेन मुनेन तनकुन पेर्मते बक्ति किय्वलिरकुन तंवा राज सीतोन इन्जेर बगवंतल वाग्दन सीतोर. अदेन साटि बगवंतले दुनियतुरा नदुडुन मुने गरिब मंवलिरकुन बरोसतगा दनेवंतलिर कीतोर. अनि वोरे तंवा राजना ईसा येतना इन्जेर वूरकुन नेमि कीतोर. ६ मिरट वीर गरिब लोकुरा हिजत वोसेर मंतिट. बति मी पोरो अदिकार ताकुसेर, मीकुन कोट्कनगा* हल्लि किय्वलिर वीर दनेवंतलिरे आंदिर कि आयुर? ओहो, वीरे आंदिर! ७ मिरट बक्ति किय्वल किरिस्तुना चोकोट्ना पोरोडुन रेह्विच वड्कवलिर वीरे दनेवंतलिर आंदिर कि आयुर? ओहो, वीरे आंदिर!

* २:६ सेलेके पन्चद्वक्नगा.

८ “नीवा नीकुन पेर्मा कीतपे नी आजु-बाजुतुरकुन गिर पेर्मा कियना” इंवल दर्मा-ग्रंत्ना मुके हुकुमुन मिरट पिय्स ताक्केके, अद चोकोट्नय गोस्टि आंद. ९ बति उंदि मोका मिरट बेद-बाव तोह्विकट्टे, दर्मता कानुंतड हुकुमकुन पिय्स बयमन आसि पापिर आंतिट. १० बारितेके बोरे आयि अद कानुंतगा मंवलिक सम्दो हुकुमकुन पिय्स ताक्सेर, उंदि हुकुमुन टूटि कीसि ताक्केके गिर, वोर पूरो दर्मता कानुंतड हुकुमकुन पिय्स ताक्मकि इंवल बद्नम आंतोर. ११ बारितेके “पीर किय्वा” इन्जेर वेह्तोर बोरे, “बोनय जीवा गिर येत्वा” इन्जेर वेह्तोर. अदेन साटि वोरोर मायनल पीर किय्वेके गिर उंदि मोका बोनय जीवा येत्तेके, वोर अद कानुंतड हुकुमकुन बयमन आसि ताक्तोर आंतोर.

१२ अदेन साटि माकुन मोकडो सुटि किय्वल कानुंतुन पिय्स, बड्क्कतुन हिंदल अनि काम कीततुन हिंदल बगवंतल तस्वा किय्वल मंतोर इन्जेर दिहंते ताकना. १३ बारितेके दुसुर पोरो दया तोहुर वूरकुन बगवंतल तस्वा कीनेके, वूर पोरो गिर दया तोहोर. बति बूर्ते दुसुर पोरो दया तोहंतेरो, बगवंतल तस्वा कियन नेटि वूर वेले संतोस अनि आनंदने मंदंतेर.

बरोसा अनि काम कीसि तोह्वल

१४ नावुर दादलिर-बायिक्निट! “नाकुन येसु किरिस्तुन पोरो बरोसा मंता” इन्जेर वोरोर मायनल वेह्तोर इंटु बति, अद बरोसा मत्ता तीर काम किय्वेके, आतल बरोसा बततुने कामि सियो. आतल बरोसा मायनन बचि किया परंता कि बतल? बचि किया परो. १५ नमुनतुन वोरोर दादले आयि, सेलेके उंदि बायिय आयि, तिंले तिंडि सेल्वक सेलेके, पोंड्ले कप्पिड सेल्वक मत्तेर इंट. १६ अस्के मिरट वोर दादन सेलेके, अद

बायिन बतय मदत किय्वकने, वूर सडा, “सांतिते सोन्जि, पेटिमेन तिंटु अनि मेंदोल-मेन कप्पिडं पोंडट. अस्के मीकुन गर्मि वांता. इव सम्दो मीकुन बगवंतल सींतोर” इन्जेर सिरिप गोस्टिनेन वेहतेके बतय पायदा पुटो. १७ अदे तीर्दे बरोसा मंता इन्जेर वेहिच, बरोसा मत्ता तीर काम किय्वेके गिर आतल बरोसा वोंटरि आसि सांता.

१८ बति नमुनतुन बोरे ना सडा, «नाकुन येसुन पोरो बरोसा मंत» इंदनुर्ते, अस्के नना, «नावा बरोसतुन चोकोट्नड़ काम्क कीसि तोहंतोन्» इन्जेर वोन वेहिच, «नीवा बरोसतुन काम किय्वकने तोहा पर्कि कि बतल?» इन्जेर पूसि कींतोन. १९ बगवंतल वोरोरे मंतोर इन्जेर निमे बरोसा किय्वल चोकोटे बति, बतल पायदा? अहन बूत्क गिरे बरोसा कीसेर, वेरिसि तरा तरा आसेर मंतड.

२० एहे पिसटि! काम कीसि तोह्वकने मंवल बरोसा बततुने कामि सियो इंवडुन गवा पहजे कि बतल? २१ मा तोत्तोर बाबो अब्राहमुन हेतु कीम. वोर तंवोर मरि इसकुन बलिदान सिय्वल बोव्लत पोरो बलि सिय्ले आनेकेते, बगवंतल वोना कार्यतुन सूडसि, वोन नियत्नोर इन्जेर वोस्पोर कि सेले? २२ वोना बरोसतुन केय्दे कीसि तोह्वल मिरट करि कींतिट कि सेले? वोर तंवा बरोसा बातल इंवल केय्दे तोह्तोर. २३ “अब्राहम बगवंतन पोरो बरोसा इर्तोर. अदेन हिंदले वोन नियत्नोर इन्जि बगवंतल वोस्पोर” इंवल दर्मा-ग्रन्ता वचन पूरे माता. अद तरिकते अब्राहमुन बगवंतनोर सोसल इंवल पोरोल वाता. २४ इद सूडसि, मायनल सिरिप तंवा बरोसतुन हिंदल आयो बति, तंवड कामकुन हिंदले,

नियत्नोर इन्जेर बगवंतल वोस्पोर इंवल मिरट करि कींतिट.

२५ अदे तीर्दे, राहबु[#] इंवल लन्जे वेय्लो इज्जयेल देस्मुर कब्रियलिरकुन तंवा रोन मकुसि, सम्दो मान-मर्यदा कीसि दुस्रो सरिय सारि कीता. अद चोकोट्ना कामुन हिंदल, «नियत्ना वेय्लो» इन्जेर बगवंतल वोस्पोर. २६ बहंते परन सेले अद मेंदोल साता लेकते वांतयो, अहने चोकोट्ना काम कीसि तोहुर वूरा बरोसा गिरे साता लेकतेन वांता.

मीवा वेन्जेडुन जरब्ने मनल करुसट

३ नावुर दादलिर-बायिक्निट! मिट्टगटल वेलेटिर बोदा वेह्वलिर आय्मट. बारितेके बोदा वेह्वलिर माकुन वेले कटिंता तस्वा मंदंता इंवल मीकुन टावये. ३ मरट सम्दिर गिरे बचोडो गलितड कींतिट. तना वड्कवलिक गोस्टिनगा उंदि गिर तप कियोर वोर बर्पुर गुन वाले मायनल आंतोर. आतोर मायनल तंवा पूरो मेंदोडुन जरब्ने इरा परंतोर. ३ मरट ताकुस्ता तीर ताकना अनि मावा जरब्ने मंदना इन्जेरेंते कोंदन^{*} वेसुनि दोहंतट. ४ अहने डगुर रूकता नमुना येतेके गिर, बेय जोर्ते वडि वासि तान दुर्सेर वोंता. बति तान ताकुस्वल मायनल अद रूकतुन पेजे मंवल चुडुसि कटेतुन^{*} तिरुस्तेके, तना बेके सोंदना इतेके हके तान मलुसा परंतोर. ५ अहने वेन्जेर मावा मेंदोडगा चुडुसि बागम आंद. बति अद बेय डगुक डगुक गोस्टिड वड्कंता. अदे तीर्दे, चुडुसि मिन्गुल डगुर केडतुन बचोर-बहन डुंडुसंतयो सोन्च कीम्ट.

६ मावा वेन्जेर गिरे उंदि तड्मित दात्नय आंद. करब्ने निन्चि मंवल मावा मेंदोडगा उंदि बागम

* ३:३ ग्रीकु बासते इहिन लिहि कीसि मंता: कोडता मुस्कुरितुन लगम दोहंतट. * ३:४ तेलुगुते अद चुडुसि कटेतुन «चुक्कानि» इंतेर.

२:२५ येहोसुवा २:११

आसि मंता. अद वेन्जेर करबुन पूरो मेंदोडगा पगि कीसि, माघ्नना जिन्गनितुन तङ्मित दात लावि कींता. अहन लावि किख्वल सक्तितुन अद वेन्जेर पातङ्गतल* येतंता. ७ सम्दि जंवरकुन, पिटे-पुरडुन, पुर्ग-बुसितुन, सम्दुरतगा मंवलिक जिव्रस सम्दोतुन इदेन मुने अनि इंके गिर मायनल जरब्ने इसेरेन मंतोर. ८ बति वेन्जेडुन इंके वेरि बोरे तंवा जरब्ने इरा पर्मकि. अद वेन्जेर जीवा तेंड्वल विक्ने निन्चि अविवक्ने करब कीसेरेन मंदंता.

९ इद वेन्जेडेन मरट पर्बु आय्वल बाबो बगवंतन डगुर-पान सींतट. इदे वेन्जेडे बगवंतना रूप्ने पुट्तोर माघ्नन सापेना सींतट. १० आसिर्वाद अनि सापेना उंदिय तोड्दल बहिर वासेर मंतड. नावुर दादलिर-बायिक्निट! अहन मरट मंवा. ११ सोवोर येर अनि चोकोट्ना येर बस्केट्के उंदि जलतल पूटे मायोड. १२ नावुर दादलिर-बायिक्निट! अन्जुरि मरतुन मर्का पंडिड* बस्केट्के सादोड. अह्ने आडुर वेलितुन अन्जुरि पंडिड बस्केट्के सादोड. अदे तरिकते, सोवोर येता जलतल चोकोट्ना येर पूटे मायो.

बुदि-गियन वालिर

१३ बुदि-गियन वालिर अनि समज्दार्क मी रोपो बोरे मंतेर कि? अहन मत्तेके वूर सते-पांदे ताक्सेर, बुदि-गियन सीता अद चुडुर-पांदुन पिय्स, वूरड कार्यन तोहट इंट. १४ उंदि मोका मीवा दिलतगा कुटा कुटा अनि लाल्सल गुंते मन्जि, डगुक डगुक गोस्टिड वेहचेर सतुन मकुसिय्मट. १५ मिह्गा मंवल ईतल बुदि-गियन स्वर्गनल रेय्स वाय्मकि. इद मीकुन दुनियतल वाता बुदि-गियन आंद. ईतडगा बाव-बक्ति सेले. इद सय्तंदा बुदि-गियन

आंद. १६ बहन इत्तेके बगते कुटा कुटा अनि लाल्सलिक गुन्क मंदंतडो, अगा जगडड लोलिड अनि सम्दो तीकर्नड करब काम्क मंदंतड.

१७ बति स्वर्गनल वाय्वल बुदि-गियन वेले पवित्रा आंद. अद बुदि-गियन सांतितुन पेर्मा कींता. अद बोने बतय इंवक सादु आसि मंदंता. अद बुदि-गियन वेहता तीर केन्जंता अनि दयते सूडंता. अनि अद चोकोट्नड काम्क कीसेर बेद-बाव तोहवक मंदंता. अद बुदि-गियन सतेमुन पिय्स ताकंता. १८ सते-पांदे अनि सांतिते ताक्वलिर अद विजतुन वीच्चि, सत्ना अनि सांतिता पंटतुन कोयंतेर.

बगवंतन करुम वरट

१९ मिह्गा जगडड अनि लडेय्क बततुन हिंदल जग्सेर मंतड? मीवा दिलतगा पुट्वलिक आसन उंदितुन उंदि अर्सि वाय्वा सोन्जिने इव जग्सेर मंतड. २ मिरट आसा कीकिट बति, अद मीकुन पुटो. अद कुटा कुटा गुंता आसतुन साटि माघ्नन जकंतिट. जगडड अनि लडेय्क कींतिट बति, आसा कीकिट अद मीकुन पुटो. मिरट कोर्ता अद मिह्गा मनो. बारितेके बगवंतन मिरट तल्किवट. ३ मिरट बगवंतन तल्केके गिरे अद मीकुन पुटो. बारितेके मीवा सुक-बोगुन साटि कर्चि किय्ले करब्ना आसते तल्कंतिट.

४ इद दुनियतड सुक-बोगुन सडा दोस्तन कीतेके, बगवंतन पेर्मा कीतप आयो बति, पीर कीतप आंता इंवल टावा सेले कि बतल? इद दुनियतुर सडा दोस्तन कीका इंवल, बगवंतन पगा-दारल आंतोर. ५ “बगवंतल मा सम्दिरकुन सीता, अद आत्मते मरट तंवय बक्ति कियना” इन्जेर

* ३:६ पातङ्गतल: सेलेके सय्तंदल इन्जेर मंदंता.

* ३:१२ ग्रीकु बासते ओलिवा पंडिड इन्जेर मंदंता.

दर्मा-ग्रंतनगा, वटि आगमे लिहि कीसि मंता इंतिट
कि बतल? ६ बगवंतल माकुन वेले पेर्मता-दयते
सूड़सेर मंतोर. अदेन साटिने दर्मा-ग्रंतनगा,
“बगवंतल गर्वते मंवलिरकुन उल्टा तिरियंतोर.
बति कमि-पांदे मंवलिर पोरो पेर्मता-दया
तोहंतोर”#

इन्जेर लिहि कीसि मंता.

७ अदेन साटि, बगवंतन मुने चुदुर-पान कीसि
मंट. सय्यंदुन उल्टा तिरियट. अस्के वोर सय्यतन
मिह्यगटल परर आंतोर. ८ बगवंतन करुम वरट.
अस्के बगवंतल मी करुम वांतोर. पापेस्तलिर्निट!
मीवड पापकुन नोरट. बहके मातुर्निट! मीवड
दिलकुन सुदुड-पान कीम्ट. ९ पापेस्तलिर्निट!
विचर्ते अनि दुकसते मंट. जोर्ते आडट. कञ्चडुन
बद्लि आड़सेर अनि आनंदुन बद्लि दुकसते
मंट. १० पर्बुना नदुडुन मुने मीवा मिरट चुदुर-पान
कीसि मंट. अस्के पर्बु मीकुन डगुर-पान सींतोर.
११ दादलिर-बायिकिन्ट! मीवा मिरट वोरोन वोरोर
बयमंते राड्मट. तंबोर सोसन राडि सीतेके आयि
सेलेके वोन पोरो तस्वा कीतेके आयि, वोर
मायनल दर्मता कानुंतुन बयमन आतोना लेकते
वांतोर. मीवा काम सिरिप अद कानुंतुन पिय्सि
ताकना. अद कानुन चोकोट्ना सेलेके वायुट्ना
इन्जेर तस्वा किय्वल मीकुन हक सेले. १२ पर्जतुन
पोरो नायदा तस्वा किय्वल अनि दर्मता कानुंतगा
हुकुम्क लिहि कियुस्वल वोरोरे बगवंतल आंदुर.
पर्जतुन बचि किय्वल अनि नासेडम किय्वल गिर
वोरे आंदुर. ते आजु-बाजुतुर पोरो सिक्सा वाटट
इन्जेर वेह्ले नीकुन बोर अदिकार सीतोर?

डगुक डगुक गोस्टिड वेह्मट

१३ केन्जट! “नेंड सेलेते नाडि बत्तेर उंदि चहर्दे
सोन्जि, अगा उंदि साल वेरि मंदंतोम. वरट! अगा
बेपरि कीसि कोतड वेले कमय कीकट” इन्जेर
वेह्वलिर्निट करि कीम्ट. १४ नाडि बतल जर्गतयो
मीकुन टावा सेले. मीवा जीवतुन बारेते सोन्च
कीम्ट. मिरट जुलुक दिसि उंडे जुलुकने मयड
आसि सोंवल, पोयता दुहरतुन दात्नुर आंदिट.
१५ अहन इंवडुन बद्लि मिरट, “पर्बु जीवते
इर्तेके, इद कीकोम अद कीकोम” इन्जेर वेहना.
१६ बति मिरट अहन किय्विट. लांडि-लाबड डगुक
डगुक गोस्टिड वेह्चेर गल्तिड कींतिट. १७ अदेन
साटि चोकोट कियना इंवल, टावा मन्जि गिर
चोकोट कियोर वोन पाप लागंता.

दनेवंतलिरकुन दम्कि सिय्वल

१८ ये दनेवंतलिर्निट, केन्जट! मिरट दुकसते
आड़सेर किलियट. बारितेके मीकुन
गाचर-गंडल्क वाय्वलिक मंतड. १९ मीवा
दन-दव्लत कडियंता अनि मीवड पाडुक वेलुम
पियंतड. २० मिह्यगा मंवल सोने अनि कूरा चिलिम
पियंता. अद चिलिम मी पोरो उल्टा गवा वेह्विच,
मीवड मेंदोलकुन तड्मित दात डुंडुसंता. इव
आक्रितड दिवोस्कने गिरे मिरट वेले दन-दव्लत्ना
डीग वाड़सेर मंतिट. २१ केन्जट! मी वहुकनगा
काम किय्वलिर बूयतलिरकुन, मिरट बूति
सिय्वकने पसि कीतिट. वूरड बूतिड मी पोरो
पिरदि कीसेर मंतड. वूर बूयतलिरा आड्वल
स्वर्गा दलम्नोर पर्बुनड* केवकुन केन्जा वाता.

* ५:४ स्वर्गा दलम्नोर पर्बुनडः इत्तेके सक्ति वाले बगवंतल.

४:६ गियंतड गोस्टिना ३:३४

५ बोमित पोरो मीकुन पसंद वाता तीर सुक-बोगे पिसेर, कोय्यल दिनमुन साटि, मीवड दिलकुन कोडचुसि तयर कीसेर मंतिट. ६ मिरट नियत्ने ताक्वलिरकुन सिक्सा वाट्सि, वूरकुन जक्किट बति, वूर मीकुन मर्ला बङ्गमकि.

सम्दोतुन वोर्चि मुने दायना

७ अदेन साटि दादलिर-बायिक्निट! पर्बु मल्सि वानल वेरि, मिरट वोर्चि चोकोटे सूड्सेर मंट. बहन इत्तेके, वोरोर केतिदारल तंबा बोमितगा वाट्वल चोकोटना पंटतुन साटि, बहन सूड्सेर मंदंतोरो दिहंते करि कीम्ट. वोर केतिदारल मोदोडा पिर वासि* पंटा पिरंता अगटल्ते बेर्सि, पंटा कोय्यले वानल वेरि वोर्चिकुन चोकोटे सूड्सेर मंदंतोर. ८ मिरट गिर मंदुन गट कीसि, वोर्चि सूड्सेर मंट. बारितेके पर्बुना मल्सि वाय्वल वकत करुम वासेर मंता. ९ नावुर दादलिर-बायिक्निट! वोरोन पोरो वोरोर चहिड्ड वेह्मट. अहन वेह्तुरकुन पर्बु सिक्सा वाटंतोर. केन्जट! वोर नायदा तस्वा किय्यल अदिकारि वेय्ये वाय्वल मंतोर.

१० नावुर दादलिर-बायिक्निट! पर्बुन बारेते वेह्तुर पर्वक्तलिर तक्लिब्क बोगे मातेर. वूर पर्वक्तलिरा नमुना येच्चि मिरट ताकट. ११ तक्लिब्क वोर्चि बरोसते ताक्तुरकुन आसिर्वाद येतुर इंटट. योबुना वोर्च्वल गुंतुन बारेते केन्चि मंतिट. पर्बु वोन आक्रित बातल इनम सीतोर इंवल मिरट सूड्तिट. पर्बु वेले दया अनि किवुल वाले आंदुर. १२ नावुर दादलिर-बायिक्निट! सम्दिन तेर मुके बतल इत्तेके, स्वर्गना पोरोडेन आयि, बोमिता पोरोडेन आयि, उंडे दुसो बततय पोरोडेन आयि, मिरट वोट वाट्वा. सिरिप

बतल मंता अद वेहट. अहन मत्ता तीर वेहतेकेन बगवंतल मीकुन सिक्सा वाटोर.

१३ मिहगटल बोरे आयि तक्लिब्कनगा असि मत्तेके, वोर पार्तना कियना. आनंदने मत्तोर वोर, बगवंतन पार्तना-विंति कीसेर पाटड वारना. १४ मिहगटल बोरे आयि येड्कि-दुक्ने मत्तेके, चर्चितुर पेदोलकुन वोर केयुसना. वूर वासि पर्बुना पोरोडे निय सोक्सि, वोन साटि पार्तना कियना. १५ अहन बरोसते वूर पार्तना कीतेके, वोर दुकेलल चोकोट आंतोर. पर्बु वोन चोकोट कींतोर. उंदि मोका वोर पाप्क कीसि मत्तेके, वोनड पापकुन पर्बु मापि कींतोर. १६ अदेन साटि बवे पाप्क कीसि मन्किट्ते, बोनड वोह्क पाप्क मी नड्डुम मिरट वोपट अनि वोरोन साटि वोरोर पार्तना कीम्ट. इदेन हिंदल, मीवा तबियत चोकोट आंता. नियत्नोना पार्तना वेले सक्तिते मन्जि बचोरो चोकोट किया परंता.

१७ येलियल मा दात्नोरे सादरन मायनल आंदुर. पिर अर्बा इन्जेर तंबा मंदे पार्तना कीतोर. ते सडे मूंद साल्क वेरि, बोमित पोरो पिर अर्मकि. १८ अद आता पेजे पिर अरना इन्जेर मर्ला पार्तना कीतोर. अस्के हाबर पिरदुन अरुस्ता अनि बोमि तन्गा उस्तड पंटड पंडुस्ता.

१९ नावुर दादलिर-बायिक्निट! मिहगटल बोरे आयि सते सरदुन बह्के मातेके, वोन मल्सि सत्नगा तत्तेके इद गोस्टितुन करि कीम्ट. २० पापेस्तन पाप्ना सरितल सते सर्दे मलुस्तोर वोर, पापिना आत्मतुन मरंतल तपुसि, बचि कियुस्तोर आंतोर. इदे आय्वा पापिनड पापकुन बगवंतना केय्दे वोर मापि कियुस्तोर आंतोर.

* ५:७ अद जागतगा उर्सन वकले जरसि पिर वांता अनि पंटा कोयन मुने बेय पिर वांता.